



## 雞嫲跳子

頭擺，吾屋下就畜當多雞鴨，印象中，禾埕項不時就看得著大大細細个雞仔行上行下；阿姆手項乜時時就擎等雞祛，逐等強強會走入廳下个雞仔。吾屋下畜个雞仔，全部係自家雞嫲孵出來个。記得該央時，異像有畜兩三隻雞嫲，一隻雞公。吾伯姆會整理雞糞，佢識看佢拿禾稈絮糞分雞嫲孵卵，在禾稈底下還會攤兩三皮仔菸葉，伯姆講恁仔正毋會發雞蟲。吾屋下面前係田，後背有一大片竹園，雞嫲帶子做得落禾頭田無就竹園肚去絡食。逐年春頭，吾姆恁多子嫂就會裝便雞糞分雞嫲生卵，雞嫲生卵到罇額，就會賴孵，孵大約半個月邊仔，雞卵就會打觜，接等雞子就出卵殼哩。一窰雞子出盡，雞嫲孵卵个頭路就完工地。續下來，雞嫲愛帶等一群大細出外絡食。雞嫲食東西該下，會先用爪仔蹶過正用觜去啄，雞子就會學。有時大人改菜地會改著雞嫲蟲、地蠶仔這兜，就會拈分雞嫲子食好料。

僇俚客話肚有一句俗諺「鷺雞嫲孵鴨春，鷺姐婆惜外孫。」這係在農村正看得著个景象。記得吾屋下頭過乜有畜鴨仔。因爭屋面前个田項有一條大水圳，對河壩脣透水蔭田用个，長年透天就有水流。吾姆就喊吾爸在圳脣搭一細間仔鴨寮，加減畜兜鴨仔，過節抑係拜伯公愛用著就有。吾二叔毋知在哪位捉一對鴨公、鴨嫲轉來；下後鴨嫲生卵，鴨嫲毋會孵，就拿分雞嫲共下孵，孵出來个鴨子，跔等雞嫲一哪絡食，雞嫲乜毋知佢渡个係別人个子兒。「姐婆惜外孫」就乜共樣係惜外姓人个孫仔。下把仔會堵著一個做阿婆个搨等細孫仔，邊脣仔个就會講「還好福氣唷！恁得人惱个孫仔。」輒常會聽著該做阿婆个講：「哎唷！鷺（外）个啦！」

一隻雞嫲係有帶子个時節，性體變到當惡，為著保護細子，會同敵人拚命。記得有一年熱天，該日吾一屋下人堵堵在灶下食晝飯，玄風對屋背竹園傳來雞嫲嘎嘎滾个叫聲，異像同人相打个樣仔，吾姊飯碗放啊忒，對門直出，走一路去到屋背竹園，看著該雞嫲翼開開來，頸筋項个毛撐撐，腳爪跳起來向前爪一路去，觜仔乜啄無停，厥面前係一尾像食茶杯仔恁粗个「臭青嫲」，頭探探仔愛吮雞嫲。原來有一隻雞子分該尾蛇捲去地，雞嫲賠命仔愛去救。下後，吾大哥來到將蛇逐走，衰過該隻雞子也無命哩！

一隻雞嫲帶一窰雞子，到雞子生粗翼，就會放佢出去自家絡食，恁仔安做「雞嫲跳子」。這表示雞子大哩，毋使哀仔照顧同保護哩。這種情形同地球項各種動物个生性共樣，一代一代繁衍，生生不息。雞嫲跳子該下，係還有毋肯走个雞子，雞嫲會將佢逐走，甚至用觜大力啄落去，這就無像人類會縱子，甚至護上天。

作者：龔萬灶

### ☆詞彙學習☆

【雞祛】gie' kia：驅趕雞鴨的竹器。

【絮糞】xi deu：在雞窩裡鋪上稻草。

【雞蟲】gie' cii：雞身上的蟲子。

【賴孵】lai pu：母雞準備要孵蛋時。

【打觜】da' zui：禽類出生時啄破蛋殼。

【玄風】hien' fung'：突然，沒有意想到。

【賠命仔】poi' miang e'：拚著老命，極力。

【護上天】fo song' tien'：一味無理性的袒護著。